

# 道元卷之一百五十七

<p> 夫检精捕非，守之合微。造尺之法，用福地桃木，或雷震枣木为之。择甲子日造。准淮尺长一尺二寸，厚八分，阔一寸二分。正面三台七星，罡星指下，书元帅有令，赐尺度人。随心所指，山岳摧倾。急急如律令。背上刊七星隐讳，三台北斗星，下书元帅有令，赐尺度人。受持不怠，与尺同升。急急如律令。左侧太乙力士，右侧二十四神。雕造毕，写天蓬咒，用水调朱填篆。以绛纱囊盛，早晚诵咒烧香，存召掌尺将吏。凡有无知下鬼，恼乱生人，持安面前，结五岳印，丁立，其邪鬼见皆灭形。凡人能思空洞，游神淡漠，受持不怠，德业自充，不须符水行遣，咒诀祈祷也。但尺之指，指山山裂，指海海竭，久久护持，神功无不利矣。此尺驱瘟伏邪，天蓬门下常有千兵万将备卫神尺也。右按《元应册》，天蓬法尺则长一尺二寸，以应一年十二月，阔八分，取八节，厚四分则四时。上罗星斗，正玦衡之政，下曲敕字，以受事之凭。是以四始入靖，八节存真，岁旦除日，思存诵咒请炁潜入灵光，玄妙神验。镇百邪於欲界，超形神於上清。法旨须用师传，妙道惟在心受。无忽无泄，敬之慎之。 正顺 贪巨禄文廉武破元帅有令赐尺度人受持不怠与尺同升急急如律令生 阴敕下横文生字 反逆 □□□□□□元 帅有令赐尺度人随心所指山岳摧倾急急如律令煞 阳敕下横文煞字 师曰：欲知神尺灵验之法，当以活龟一枚，阳转顺持，咒则生；阴转逆持，咒则煞也。神尺受持年久，功行既全，随心所用，无不验矣。太乙元君布冲和神咒煞文，北炁 三清上境，太乙元真。布和法炁，开化度人，炼魂日宫，校魄月轮。天官总炁，地官飞尘。千二百灵，万二千神。合为仙宅，立为真身。真身之中，七政九宫。心光朗耀，照立明堂。明堂大神，和炁心真。内清五藏，外召六神。精神不穷，开化度人。老者反壮，故者还新。饮食六甲，三境同寅。十二吏兵，保卫我身。百徧千徧，上朝元君。元真老君，至道独存。保守元命，卫我灵根。勤叩天鼓，和形炼神。斋满不忘，当见神尊。策空驾浮，蹶云。右诵此咒毕，引和炁下流身中，孕炁育神，方可存心布玉尺，祝三光，以尺取向，万

邪立摧。 唵吽吽。众神稽首，群魔归正。敢有拒逆，化作微尘。急急如律令。 右诵咒毕，收神尺於圣前，存元师复自顶门入。如有急患，随心治事矣。 天清清，地灵灵。十方世界，杳杳冥冥。虚无之中，上有元晶。包罗万象，总辖万灵。密行造化，不测而成。开天辟地，分其昏明。大朴既散，万类乃亨。三才定位，仁义斯兴。礼乐继作，奸邪由生。五帝迷乱，四民有争。上不宽恕，下不忠贞。或魔或鬼，或妖或精。恣横荼毒，干扰民生。全家疾患，骨肉伶仃。下绝子孕，上绝父兄。性命枉逝，魂魄幽冥。道炁混杂，善恶难明。北帝慈悲，哀悯众生。敕下神吏，剪馘鬼精。冤枉纵多，善可安平。天蓬元帅，散迹分形。赐名上帝，号曰元晶。佐天行化，显现威灵。玉帝再行，自天降临。俯育兆庶，率令和平。大圣天蓬，三十万兵。回光返明，下降天庭。巡游世界，捕逐妖精。束缚风火，收擒不停。有恶皆斩，无鬼不烹。瘟疫之吏，束首服膺。天得清爽，地得平宁。人得安养，物得开萌。邪遣归正，神显威灵。幽都开度，魂魄受生。黎民康泰，国土清平。天蓬元帅，敕下神尺，赐与良能。镇身护命，止约万灵。中有三台，上有七星。神符四面，总辖幽冥。随心所指，山岳摧倾。三十六将，护尺神兵。腾空察命，动感三清。度人延寿，灾害安宁。斩邪灭毒，鬼祟潜形。登仙入圣，随尺超升。同符日月，道炁长生。指邪归正，降独升清。六天鬼贼，见则丧倾。道无高下，与尺隆兴。登山兽伏，入海龙升。朝行露散，夜行体轻。四围神将，丙壬甲庚。兴行云雨，震发雷霆。何神不伏，何鬼不惊。拒尺者灭，奉尺者生。恶尺者辱，敬尺者荣。礼尺者寿，非尺者薨。元帅有令，北帝之盟。运行造化，七政齐并违吾之令，拒吾之盟，寸尸万段，永死无生。急急如北帝金口律令。 圆光太极，尺运神功。五行正炁，斡运无穷。青尺神王，混元之宗。丹尺神王，运景成功。白尺神王，辅道威通。黑尺神王，叱雷驱风。黄尺神王，万炁攸同。神尺一挥，十极咸通。保守三元，飞行太空。馘灭邪魔，驱使虎龙。邪念永绝，速成道功。急急如律令。 每日用水盂投宝印於中，上安神尺，圣前供养，清旦取五方炁合咒尺上。行之日久，灵验非常。巽官一击，雷电立至。 布炁式 外视不瞬，内听不昧。气孕神孕，余可及物。冥觉之中

，默诵神咒。元始太真，五灵高尊。大帝皓瑛，洞朗八门。五老告命，无幽不闻。上御九天，中制酆山。下领河海，十二水源。八威神咒，灵策玉文。召龙负水，收炁聚烟。束魔送鬼，所诛无蠲。日月五星，北斗七元。诸天诸地，诸水诸山。玉真所部，溟冷大神。仙王游宴，五帝仗幡。天#1□□□金虎后奔。辘天猛兽，罗备四门。闻呼立至，闻召立前。赤书焕落，风火无间。摄录应验，金龙驿传。急急如上帝律令敕。咒毕，望空存清炁浮浮而来，鼻引三过，吹之。凡飞尸走疰，治以所视事由。布炁之初，瞑目凝神，使神策及太一经皆攒其真炁以攻之，自然立瘥。又按八威神策及太一经，皆损有余而补不足者，明矣。世有掐诀吹嘘，存纸笔墨，皆以炁布之，攻偏滞者矣。必此人能不妄作劳视听非为，则炁专神凝，疵疠冰释，飞尸走疰，不可容也。凡持诵，先存神，面北平坐，闭目。存离卦在心，坎卦在肾。震卦在肝，兑卦在肺，巽卦在胆，乾卦在头，坤卦在足，艮卦在膀胱。八卦具存。卦中有鼎，鼎中有炁，炁中有神，光明焕赫。叩齿九通，咽液九过，诵净天地普扫咒，次念天蓬安神咒。帝郁褫玉明，帝元育齐京。太黄与大明，定光育九昌。丑音夷妙辩，理禁苑无延。招真闵巴狂，开真共定光。梵行大择法，常融育丑英。天蓬大圣力，普扫诸不祥。开目山河竭，回光天地明。日月两目睛，乾元亨利贞。急急如律令。次诵天蓬心咒，毕，以鼻吸罡炁，九咽，与八卦大神之炁混合为一。出己天门，炁去顶二寸，化为九星覆头，光明焕赫。叩齿三十六通。次诵天蓬咒，毕，念唵敕煞摩临。次念火铃咒，毕，存九星化为一炁，如日之象，下入玉池，分为九咽，叩齿九通，存入黄庭，色同紫金。事毕，凝静。太灵玄歌，上乐之虚。抱玄入妙，游宴泰虞。心无其心，形与神俱。九真超绝，方合全区。三光洞焕，八景云舆。策盖广寒庭，飞神洞毫宅。羽车驾天衢，玄歌赞神尺。超悟即飞升，咸乘微妙力。夫玄歌，皆元应之妙道，苟非物外之士，心游太漠，不可及此。行之当，使心无其心，湛然清净，寂然无为，始可为拟议矣。昔嗣师真人得此即飞升。得之者可传同志。又名北帝褒尺咒。取庆会吉日良时，备香灯时果素食茶汤七分，五彩安镇五方，焚香上启，祝云：具位姓某谨焚香再拜，启告天蓬都

元帅真君、嗣师大仙董真人，护尺神王，天丁力士，功曹仙吏，一切威灵。某宿忝微缘，受持神尺。虑香火不精，修行有怠。今遇良辰吉日，看诵经咒，聊备菲仪，志心拜献。伏惟圣造，俯赐鉴观。所愿受法救民，随心利物。凡诸罪业，愿乞赦除。即使某九祖七玄，咸令超度。俾令见世，悉赖洪恩。一切有情，同登道岸。祭讫，收尺入绛纱囊。每日行持，运炁护之。敕符咒紫庭护尺神，敕下水火轮。口中喷火焰，哮吼震雷音。黑云蔽日月，两手握乾坤。赫赫大威力，随愿速降临。急急如律令。面东，诵天蓬咒七七遍，四句一啄齿。再念紫庭护尺直咒，北炁吹尺。存神王长千文，口眼出火。赤发青面，手持尺，来入神尺中。师每日朝真毕，於神将前持尺，先置於九天宝印水盂之上，掐九天宝印诀，东向，或立或坐，脊思日月焕於之府，九晨临於帝席，光明发於顶后，赫然作九色圆像，内外洞明，翳冥一室，四兽侍立。次叩齿九通，咽液九过。澄心静念，掐本师诀，想元帅在紫雾中，真像如前，威容震怒，两眉之间降玄色之炁，缠络我身并尺。以鼻引咽之，九吸三咽，灌溉三田之中。内外洞明，六丁六甲左右侍立大仙，护尺神王并三十六将立元帅左右。五方护尺神王，讳真索吠。初持尺，以符牒召之，后不用符，只念持尺咒召之，存至左右。持尺咒见前。凡诵北帝持尺咒毕，存九灵妙炁青玉之辉九芒入尺。又咒云：曜道枝正会条。诵三遍，存九灵咸耀之炁，九芒赤色，如金丝下临，引入尺，掐卯诀主之。又咒云：将军梁高骞爽。诵三遍，存结璘之精十芒下临，引入尺，掐酉诀主之。又咒云：□□□□□□□，役使万灵总煞摄。诵三遍，剔戌辰斗存北斗玄黄之炁入尺。次诵天蓬咒，逆顺敕之。想神尺光明万道，赫奕天地。五方神王、天丁力士、二十四神森然侍卫，一切万魔，莫敢前冲。祝香步斗，入意。存自己肾中黑炁腾腾荡荡，上至头上，忽结成一，乃玄元帝君也，宝耀花冠，披离罗之帔，飞凤羽裙，瑶药珠玑之履，执碧珪。童子持七宝之匣，云锦之案，流精花佩，琼凤香炉，玄龙神虎之剑，飞云凤炁，光明玉几，麟尾拂。左右侍真玉女各百人，垂十绝之幡。师仰首一见尊颜，眼光变像成玄元色，掐天蓬诀，急脚步斗。毕，再台首仰视金容，紫雾中见金眉真人天蓬元帅，三面六臂，

执七星剑、金铎、戟、弓箭、六和索，身长五十丈，披金甲若龙鳞，身在神谷，赫赫万里，叱吃震怒。顷刻，左右神兵玉童玉女三十万人，皆黑衣紫炁冠，乘太玄煞炁。叩齿三十六通，鸣天鼓二十四下，然后转身面北，诵天蓬咒、《天童经》各一遍。再诵咒曰：神人神人，五脏光生。存神体骨，养我华精。天蓬天蓬，扶卫我形。精神所在，神光所存。所愿者得，所向者亨。急急如律。#2 次用上帝诀，煞鬼符，再诵上帝遣天蓬咒，以符灰一吹，禀敕奉行。存威震天地日月。每日神将前行持讫，左手掐天蓬诀当胸，右手持尺，存元帅降在空中，董大仙左右边日月分辉交映。元帅两眉之间，布降玄色之炁，缠络我身。左鼻引此真炁咽之，注五藏六腑百关之中，五彩洞耀，内外洞明，六甲六丁立于左右。次法靖内或立或坐，左手都监诀，右手持尺，叩齿七通，诵天蓬咒咒尺，不可出声。存见祖师乘云回阙，神将驻扎法院。出靖闭户，不得反顾。每日诵天蓬咒、《天童经》祝奉将史。奉持此法之士，朝夕卯酉二时，入靖焚修，朝礼三清、四帝、北极元帅、大仙。须先整法服冠履，次念净三业咒。北帝神君，吐炁成云。臣今净口，持念真文。顺道者生，逆道者死。急急如律令。吸北炁咽之。天蓬大将，北帝神君。巡游世界，普济人民。诛魔斩鬼，灭影除形。有何鬼魅，辄敢张鳞。太上灵宝，为臣净身。急急如律令。吸东炁吹身。净心业咒，天蓬天蓬，持剑当胸。奉承北帝，有大神功。臣今净心，勿使秽冲。急急如律令。吸东炁咽之，闭。宁息，叩齿九通。清旦，存四灵神兽侍卫左右，叩齿三通，於靖户外入。盖入巽而登乾也。瞑目，思日月分辉夹映左右。左顾招郁仪，以收日精。右盼携结璘，以召月华。停轮，眉后空穴。紫光转烛，洞映一身。次念太阳炼身咒。太清灵神，化度郁青。朝霞藏辉，灌炼五形。宫驾，七神调平。死结解散，胎根肃清。元始上真，双景二玄。右拘七魄，右拘三魂。合我神明，与形常存。右诵毕，次诵入户咒。四明功曹，通真使者。传言金童，侍靖玉女。为臣通达，道室正神。上元生炁，流入臣身。令臣所启，皆得上闻。四明功曹，龙虎使者。正一生炁，侍靖。夜有启请，愿得开明童子，上玄少女，为臣俱入黄房之中，速达所启，咸得上闻。诵毕，面圣进步，烈火丰


香，三上香。再拜跪奏毕，三礼，退身，念出户咒，移左足出门，不得反顾。如持尺，未可念出户咒。出户入户念咒，并如正一旨要。北星玄真，魄灵帝君。流辉内映，挟卫斗魂。三台灌华，七躔液津。金瑯虎篆，备卫生门。使我神灵，蹶轮紫庭。取五月五日，及每月五日十五日二十五日，於西面东坐定。叩齿三十六通，将目闪二十四次，存两目有两道光芒如火，将身一炁都尽，只有一炁团团。次见前炁团如圆镜，其光变作我形，吞入口中咽之。闭目澄神，诵天蓬咒《天童经》三卷，布东方金光起满长空。光中忽见祖师元帅，领神兵万万，将口一吸，吞下五藏。九窍百孔闭息，渐渐通炁。候定久，方出靖。切忌人冲之。出肝府青炁一道，清莹光明，自口而出，存之如真，使耳闻其炁有琅琅之音。然后思此炁遍於吾身，化为元帅。次诵启请咒，随心祷祝。存天中九道青炁，从东方直降我目前，清莹分明，使耳闻其炁有钟鼓琅琅之音。以鼻引入身中，与肝炁相接。次见炁中有云，有元帅俨然在前，端坐于正中，部领神王。如清旦之仪，启祝而退。久久不怠，施用神妙，不可具述。吾头戴天圆，足履地方。冠带九炁，结为衣裳。日为圆像，月为夜光。身披北斗，六甲九章。左据河魁，右倚天罡。能伏诸恶，消殄不祥。急急如北斗律令敕。祝曰：命神元吉，真宰致灵。臣今所启，愿得上闻。急急律令。祝毕，先右足入户，令形神应机。至香案前，心拜四过，焚香，祝曰：祥烟散景，瑞炁腾空。一炁宗神，普同供养。侍香典者，凡祷敷传。启事毕，思存玉女真形，香霞贯体，心拜而退。凡至靖户，祝曰：召阳呼阴，黄宫肃穆。礼周事毕，备生。按《玉经》注及《双景翼形》云：左顾郁仪，以致日精，右盼结璘，则招月神。两眉角后小空处曰府，明堂正入二寸曰金华宫。靖户则道室之门，亦巽也。朝真之妙，法入巽而登乾。十方，则身中上下四维。九色，则九天之正炁也。夫人之生，禀九天之炁，假合以成形。得生之后，当存九天之炁，解三部中二十四结，所以令人孔窍开通，九户无碍上通九天，九炁相应，均为一体，然后可以致真召灵。夫证幽入微，各有梯级，焚修为之首耳。盖以世人血秽，玄积胎结，结解三田未滤，非香诚荐福，无以格于高穹也。叩齿诵咒曰：泥丸洞明景，诵我馘魔音

。玄祖度八难，躬身紫微庭。七液回路，三光映真。午时，北向平坐，内视四神，存日月、五星、四曜下洞房中，光辉炜烨，蔚然贯体於帝席。叩齿七通，咽津七过，咒曰：九皇太精，北极帝君。益臣胎精，强臣三魂。左拘日华，右制月精。晨中黄景，玄灵上真。神虎玉符，备守生门。万邪伏匿，受炼斗君。右叩齿三十六通，诵天蓬咒，毕，复存三光之炁，历玉池之渊，透入灵府，化一真人如婴儿状。以左手心抚心，念两字咒曰：造物，造物。一炁七遍而止。叩齿七通，退按《伏魔上经》九真秘法，右炜三光於帝宅，一曰泥丸，四神於玉房玉池者，则玄膺，生死之举。又曰元应之考灵府者，则绛宫之丹台。三光，日月斗极之序。四神，则无英、白元、玄冥、守灵也。夫斩鬼之司，紫微之所，宝诵之，邪魔殄灭。须臾魄炼魂凝，五帝降室，三元护形，神将仙兵悉来列卫，魔精丧眼，稽首唱恭，然则众妙之阶可立升矣。苟或轻泄，则三世获罪，殃及兆身。慎而戒之。天蓬天蓬，九元煞童。五丁都司，高刁北翁。七政八灵，太上皓凶。长颅巨兽，手把帝锤。素杳三神，严驾夔龙。威剑神王，斩邪灭踪。紫炁乘天，丹霞赫冲。吞魔食鬼，横身饮风。苍舌绿齿，四目老翁。天丁力士，威南御凶。天绉激戾，威北衔锋。三十万兵，卫我九重。辟尸千里，驱却不祥。敢有小鬼，欲来见状。辘天大斧，斩沐五刑。炎帝裂血，北斗然骨。四明破骸，天猷灭类。神刀一下，万鬼自溃。急急如九天尚父灵魁宗师含元太虚天蓬都元帅真君律令。吾是北帝大臣，名书玉清，上统六天，下勘幽冥。北帝鬼宫。悉是我营。我之所部，何鬼敢生。左佩豁落，右带火铃。掷火万里，威制千灵。有犯者律，有干者刑。帝君有令，收捕无停。天罡骇动，群魔束形。鬼妖灭种，我得长生。急急如上帝律令敕。诵毕，存九星化为一炁，如日之象，下入玉池，分为九咽。叩齿九通，存入黄庭宫，如紫金色。择吉辰，取水以净器盛之，入朱砂乳香少许。次布斗罡，执水，瞑目，叩齿三通，念咒曰：太上神符，太上神水。神水散洒，万秽灭亡。自知非真，莫当吾真。神水嚙处，邪秽俱除。急急如律令。次启请元帅，三上香，三礼，存身入斗中，掐元帅诀，叩齿瞑目，诵咒一遍吹在水盂。谨请天罡大圣，愿降水中。谨请九元煞童神将九人，入

吾水中。五丁都司，七政八灵，素臬三神，吞魔食鬼横身饮风大将，并降真炁入于水中。十二月将入吾水中。左手剔子午斗入水，存火云紫炁勃勃。存元帅将兵降炁入水，咒曰：青龙吉庆，白虎卫形。朱雀顾护，玄武摄精。七液流注，五藏化生。吾敕神水，元亨利贞。急急如律令敕。再取罡炁一口入水，再握雷局，剔诀，存霹雳入水，以玉帝诀封之。仍念召咒，就大仙前供养，施与人。左右手斗印，丁罡。左手心盛枣，右手斗印指之，面东叩齿。存元帅。念：天蓬敕斩鬼摄，取青炁吹。再取罡炁三口布枣上，念：含元太虚天蓬敕。存元帅领青衣黑衣将吏，吸黑炁入枣。次念，面北存七元星像，念七遍，取炁七口，吹入枣中。与患者服。如欲报应，留核缚衣带中，枣一枚置患人头边，至夜自有报应。次日早，以金钱同枣核当门焚之。凡行持符水未应，则再加变熏，符亦换易。此乃坐坛行持。如赴请，先就法院牒将收捕下邪，下远罩，方出门，一路存将吏随行。其捧印执剑随从之人，并存为将吏。至患家近，下近罩，飞斗入其屋中，坐定，不要相见，竟行事飞罡召将，催牒存捉。或考召，则讨童子附体。如考附毕，即於患人床下立火狱。先办灰三四升，细饰。临立狱时，念敕灰咒，方铺床下，中间以镜平之，令无瑕进。用黑盏盛麻油满盏，以橐盛，安在灰心。次以纸捻符三道，一煎鬼，二四火，三南斗，符作三捻，三向安寅午戌向。凡火狱符，但以煎鬼录符为祖，余皆可变易用。次法官变神召将。即以别纸捻点灯，执在手中行持。存南方三昧真火降炁合此灯光，天地四维尽皆通赤。以左手弹巳午未诀，随下点着纸捻符，飞斗一座。复存四维有城，艮上有狱门，其内有绛桥一座，自狱门接至外，内外各有仙童玉女，旛幢宝盖，罗列左右。次焚追鬼符一道，按日使一朱一墨，召追鬼将赵公明将军至。如符使状，红抹额。须臾追至，押入狱，自桥而度，便下锁诀，闭门。存四维城上铜狗铁蛇各吐火光万丈，遂下火罩罩之，诵大威德咒，即陈白词意，指挥勘考罪尤。次握煞文，右执桃枝或尺，就狱前敲三下，云：天官捉神，地官捉鬼，水官捉精。急急。再召火狱中官将，并南方火铃将军宋无忌、炬火严、炬火形、炬火精、炬火炎四员，追鬼将赵公明，火狱中一行官将。即闭目，存至，并三十六将，诸司将兵，

应借到城隍东岳兵马，并皆罗列前后。即叩齿、诵天蓬咒，一句一啄齿，随意多少次，祝将吏守护狱门，毋令散漫。遂敕病人房，方退至房门，以山字诀双手下，存山塞其门。转身，以脚踏其门外，嚥水即退。次日看报应如何。其夜并不令人在房喧闹，令病者及直病者着衣静睡，不许开看。外人往来，灯灭亦不再点。自有报应。如闻臭气，自有验法。敲击病人狂燥火有轮光，皆报应也。如病减却，自去验狱。法师自外以斗盖首，进入房内，召诸司官将，火狱吏兵，牢固监守罪人。再飞斗罩，方以别灯照狱，验灰，看有何迹。或欲罢，即牒神将押赴所属交管。仍守待患人平安，别听指挥。烧牒了，以灰弃长流水中。即以水净之，诵净天地神籙，罢狱咒。却以符水次第服之。如病势牵延，报应未显，则再帖神将，重加火狱。却添黑盏两个，凑成三盏，以前三符，分作九捻，亦按寅午戌安之如三台状。或人家无力，止以元盏一个，添油，书九道，分作三向点法用。若先添召覆勘功曹符、追鬼符，指挥如前法。如病愈，不必更狱。如或未安，又当申奏。就於患人房前或他处建立都狱，谓之阴阳摄勘，又谓之覆勘。次日验狱，依前法。如灰迹不同，必是收捕未尽，火狱透漏，又当於火狱内，再牒将，或变五盏，按五方，或只一盏五捻五向，或变为七星，魑指艮户，以灰安斗内作狱亦可。或病未退，又於外狱催捕，看事如何行用。毛臭，山魑怪。血腥，产鬼劳死鬼。血臭，伤亡。鱼臭，水怪。肥腻臭，伏尸。□臭，家先。烧肉臭，家先同五通木神。乳臭，巫鬼。鱼腥，东府先亡外亲。焦臭，古墓家先。硫黄臭，灶神、恶祟。洞腻臭，奴婢自缢鬼。青草气，土神不安，野外山魑魍魅。烧骨臭肉气，神愿咒诅，又先亡宅神。土气、动土，灶神奏天，难安。酒气伤寒横死，伤亡孤魂。猪粪气，家亲宅神伺为祸。粪缸臭气，家先引外鬼为祟。凶猛鬼神见本相，阴沈鬼见迹。或本命上有人迹，追魂使者，急办后事，罢狱。似人迹或大或小，五通。若独一足，亦是五通。人迹粗大，木下鬼。人迹细者，木客。人迹大者，猛烈山神。双脚者绯紫之神。有靴鞋者，阴中主者。掌迹小者，伤亡鬼。掌迹大者，远年伏尸之鬼。似小指大，两头一般大小，冢墓疰鬼。小者，山林陂塘池泥触犯之鬼。骡马龟蛇形，乃泥

神古佛，土地坛席之鬼。如牛尾迹，五酉神。猫鼠迹，山精。猫迹大者，蛊毒精怪，木下之鬼。如人足者，天邪。如鼠迹小者，山魃。犬迹前尖后方者，木神，与伤亡鬼。犬迹尖者，木神。圆小尖者，水神。前圆后尖者，宅兆神。方者，宅神土地。交横者，社神。小者，飞禽野怪。鸡迹者，客亡及女鬼。鹅鸭迹，带血伤亡鬼。点点相封，或如鹅鸭犬猫鼠杂乱之类，传尸劳瘵羸尸症鬼。足足相迭者，伏尸。如蛇行及圆横相问，枉死鬼。大小似棒头点者，坛席座鬼。三点相并两两行者，客死鬼。如窟穴者，咒诅鬼。窟穴小者，土神。如蚯蚓，长，本处土地。蚯蚓短者，外来飞廉。蚯蚓粗大，古木精灵。大小如桃花者，伏尸。如刀挑起成小迹多者，本家起土造作触犯禁忌之神。凡北斗本命灯不动，平安之验。三台灯中台安静不动，吉。焚香，左手都天主印，叉腰，面北，祝曰：杳杳冥冥，天地同生。闻呼即至，有感通灵。天蓬元帅，驱鬼灭形。神札一下，万鬼肃清。即取天罡炁吹笔，会日子押字。次批状内云：北帝有令，人鬼分形。敢有拒逆，四明斩形。速去速去，不得留停。用元帅印印之。令来人将去患家灶中烧之，金钱一分同化，如意祝之。若是凶恶邪祟，用严驾夔龙符，念天蓬咒书符在状内，仍札付司命六神捕捉邪祟，押赴所属治罪。将於患人床前烧之，立有报应。 #1此下脱三字。据《天蓬咒》提及『天驹激戾』，此句当作『天驹前驱』，与下文金虎后奔对应。 #2此下疑脱『令』字。急急如律令，咒语常用句式。



[下载本文pdf文件](/pdf/528-道元卷之一百五十七.pdf)